



TAPAK 9

Aluyimer longkak aitba sentong nung Congress lenir Jyotiraditya Scindia apu



TAPAK 12

Cristiano Ronaldo anema Spain nung ken o benoka lir

VOL. XIV NO. 236 (ADOK 236)

DIMAPUR

WEDNESDAY

JUNE 14, 2017

5.00

Centre-i achiajemba nung tenokdangba kecha magütsütsü: Rajnath Singh

Aizawl, June 13 (Agencies): Hombarnü Union Home Minister Rajnath Singh-i nübortem achiajemba nung Centre-i tenokdangba kecha magütsütsü, ta ashi.

Centre sorkari nashi metepsettsü tenokdangba agütsüba anema Mizo nungertem lungkak aitba atema osangbenertem asüngdangdang, Rajnath-i "nisung ka achiajemtsü

nung tenokdangba kecha malitsüla" ta langzü.

Myanmar den arrtsüa aliba northeast state pezü nungi chief minister tem den senden ka amenba sülen osangbener senden nung jembidang, Union Home Minister-isa ashiba agi, "Ministry of Home Affairs-i Mizoram nem security dak sendakba senotsü teyari agütsütsü."

(Maneni tapak 12 nung...)

RHMS-i Dr. Surhozellie den ajurutep June 17 nü India-Vietnam Handshake Concert alitsü

Dimapur, June 13 (TYO): Rattle & Hum Music Society nung züngsem teneti Nagaland Chief Minister, Dr. Surhozellie Liezietsu den ajurutepa India-Vietnam Handshake Concert dak sendakba senden ka amen.

Iba kenten sentong ya June 17, 2017 nü Vietnam nung agitsü sentong lir aser India o Vietnam tsüngda diplomatic tesentaktep tenzüka sülen küm 45 ajungba benjung nung iba sentong ya shilem ka lir.

(Maneni tapak 12 nung...)

Yisu dang mojing ajaba atema aoksar: Acharya

Dimapur, June 13 (TYO): Gujarat board Class IX Hindi oshi textbook nung Yisu Khrista dang 'Haivaan' (moring) ta züluba osang angashia kanga aoksar aser jashir, ta Nagaland aser Arunachal Pradesh Angh, PB Acharya-i sangdong ka nung metetdaksü.

Gujarat Angh, Om Prakash Kohli dangi züluba shidi nung Acharya-i, tebilemsü mabenba mapa inyakeritem aibelenba

ajanga temulung yirutsüba dang masü saka loktiliba nung putepa aliba tensa nung timtem bener arutsüogo, ta shia lir.

Iba aibelen inyakba nisung ozüng tapet agi merenshitsu la ta Acharya-i ashi aser Gujarat Angh Kohli-ia iba onük ya Gujarat State Education Minister dangi abentsü nangzük. Kohli-isa iba aibelen atema sasa bilemba metetdaksü, ta PRO to Governor, Nagaland-i sangdong ka nung metetdaksü.

W. Bengal nung Dimapur nungi tanur ka ngua lir



Name : Putuli Alias June
Age : 12 years
Gender : Female

Dimapur, June 13 (TYO): April 22, 2016 nü West Bengal nung tetsür tanur ka GRP Radhikapuri angu aser iba dak sendakba nung Uttar Dinajpur CHILDLINE den tongtepratepdang, tanutsülaji

Dimapur airport anasa alir ta osang angazüker, ta CHILDLINE Dimapur-i sangdong ka nung metetdaksü.

Laji tang West Bengal nung shelter home ka nung lir aser lai ashiba agi, la tanur asü dang Dimapur-i anir aru aser lar tsüraburtem mebileteter. Laji Naga nung kibong ka den liasü aser iba kibong nung tanur asem lir ta ashir. Anungji, nisung kari dangi iba tanutsüla meteta lira, tsünglanglen agüja aliba number tem nung tongteprateptsü mepishir, ta CHILDLINE Dimapur-isa metetdaksü.

CHILDLINE Dimapur: 1098

(Toll free) 03862-224151 / 9615297709/9856503877.

CWC Dimapur:

9436260005/9402832493

Nagaland nungi kaketshirtem nem maongka agütsür Manipal University aser DG Ruparel College nung azüngtsü jangrartem tenüng agütsütsü akok

Dimapur, June 13 (TYO): Nagaland aser Arunachal Pradesh Angh, PB Acharya-i ketdangsiu inyakba ajanga Manipal University, Manipal, Karnataka aser DG Ruparel College of Arts, Science and Commerce, Mumbai ajanga Nagaland nungi kaketshirtem nem menden agütsütsü sangdongogo.

Maneni, Mumbai nung SNDT University aser Mangalore nung Alva Education Foundation temi Nagaland state nungi kaketshirtem nem maongka agütsütsü osang lemsatepogo, ta PRO to Governor sangdong ka nung metetdaksü.

Mangalore nung NITTE Medical Science University-ia Nagaland nung arrtsülen medical college ka lapoktsü atema Public Private Partnership (PPP) yimya nung mapa inyaksü mulunga agizükogo, ta sangdong nungsa ashi.

DG Ruparel College of Arts, Science and Commerce ajanga ashiba agi, parnoki Nagaland nungi tebur kaketshir pezü admission agitsü aser kaketshirtem indang tuition fees atema sponsor bushitsüogo.

Kaketshirtemji College indang Boy's Hostel nung angati lidaktsütsü saka boarding expenses den tanga expenses jibo kaketshirtemi agütsütsü, ta DGRASC-isa metetdaksü.

Iba college nung B. Sc in Computer Science, M Sc in Computer Science. B Sc in Information Technology, M. Sc in Information Technology, Bachelor of Management Studies (BMS), M Com (Advance Accountancy), B Com Div III & Div IV Unaided aser M Sc in Analytical Chemistry indang papers/courses agütsütsü.

University of Mumbai-i latettsüba nung ajemdaker kaketshirtem merit basis nung admission agitsü, ta parnokisa shisem.

Maneni, Manipal University, Manipal, Karnataka-ia Nagaland nungi kaketshirtem indang course fee tesadang ka College-i menoktsü aser ibaji scholarship nung shilem ka asütsü, ta metetdaksüogo.

Manipal University-i Bachelor of Physiotherapy, B Sc (Medical Imaging Technology), B SC (Health Information

Management), B Sc (Medical Laboratory Technology), B Sc (Exercise and Sport Science, BA (Humanities) aser MA (Geopolitics and International Relations) azüngtsü atema Nagaland nungi kaketshir anana nem maongka agütsütsü.

Item college aser university nung azüngtsü jangraba kaketshirtemi June 20, 2017 anogo mesüra matongdang, Raj Bhavan Kohima nung pai/lai züngnüba course den mark sheets aser Indigenous Inhabitant of Nagaland Certificate agütsütsü metetdaksü.

Kaketshirtem shirnok final exam nung 50% mesüra temaba marks ngua lir, parnoki dang item scholarship atema tenüng agütsütsü akok. Nagaland Angh, PB Acharya-i merit inyakyim nung kaketshirtem shimtsü atema luden ka shima lir, ta PRO to Governor-i sangdong nung metetdaksü.

K a k e t s h i r t e m i secy.rajbhavannagaland@gmail.com dangi application yoktsü akok aser (0370)2245789 nung osang tejangja metetpelatsü akok, ta sangdong nungsa shia lir.

Bharatiya Janata Party ya nüburttem party: Dr. Temsüwati



Mokokchung nung Sabka Saath Sabka Vikas sentong agir külen tongti tesemdanger Dr. Temsüwati den telok külemi tangokba noksa nung angur.

Mokokchung, June 13 (TYO): Bharatiya Janata Party ya nüburttem party lir, BJP nükjidong aser parnok indang sentong (programs)-temji kanga junger, kechiaser parnok indang sentongtemji tekübok jenjang nung alirtem nem temulung kanga agütsür, ta State BJP executive member, Dr. Temsüwati-i metetdaksü.

Pai iba o ya India sorkari achayanga inyakba 'Sabka Saath Sabka Vikas' Sammelan ta sür sentong ka Indian Oil Corporation Limited den yaritepa yangi Mokokchung Town Hall nung ayonga akadang metetdaksü. Iba sentong ya centre nung BJP-i aniba NDA sorkar yimsüsüba arur küm asem abensaba nüngtem nung

ayongzükba lir.

Paisa ashiba agi, BJP-i sensakeritem atema maparen jenti inyaker, BJP-i maparen ajak otia aser teraksa mapa anema inyaker, tashi lemsar inyaker (decentralization of power), nüburttem tashi agütsür, maparen ajak nung maongka sakuku agütsür, tamangba yimsü kecha tenokdangba melii amangdaksü, ta ashi.

Dr. Temsüsa BJP leniba nung küm asem tashi yimsü asü dang, mezüng anogo nungi linük nung sentong tapu balala yanglua mapa tajung aika inyakogo aser lenmang aisü nung inyakyim aika nung temelenshi adokdaksüdaki; tongtibangsa education, health sector, skill development, swachh bharat mission, National

Rural Livelihood Mission ama aser ano aika lir, ta paisa centre sorkari inyakba sentong kar atishia ashi.

"BJP ya nüburttem party lir, BJP nükjidong aser parnok indang sentongtemji kanga junger, kechiaser parnok sentongtemji tekübok jenjang nung alirtem atema tongtibangba sür maparen ajak inyaker", ta pai ashi.

"Nagaland nunga BJP sorkar kodang arudir, mapatong (project) jenti tenzüka asen lima renloksü anungji, lungjemer ajaki meranga inyakdi aser ibaji Mokokchung ama 'land of pioneers' nungi tenzüksüla aser asenok ya temelenshi bener arur kaka asütsüla", ta paisa tayongzükba ka agütsü.

(Maneni tapak 12 nung...)



Nü VOTE

Enoktsütettsüsa anguba nüchiso jenjangji Tongtibang temeten ka dangbo masü, Saka nai nü tarutsü tia shimtetba mapa ka lir.

AIBOC-i Centre sorkar telemtetba magizüker: D. Thomas

Dimapur, June 13 (TYO): Centre sorkari PSUs privatize asütsü anema All India Bank Officers' Confederation (AIBOC)-i ashiba agi, bank tem privatise asüba ajanga aluyimertem, kaketshirtem aser nübortem timtem ajurutsü.

Mongulbarnü Dimapur nung AIBOC, general

secretary, D. Thomas Franco Rajendra Dev-i ashiba agi, "India ama linük ka nung bank talila lapoktü nungdaker, kechiyong yimtsüng tia nung aliba tesemtem nung banking services ano metongjemi lir."

Sorkari PSUs privatise asütsü melena, Non-Performing Assets (NPAs) dak mapa inyaktsüla aser

Parliament Standing Committee on Finance-i ashiba ama inyaktsüla, ta D. Thomas-isa metetdaksü.


"Asenoki public sectors banks tashi itdaksütsüla. Tang aliba tensa nung shishilembar tilatem aser nübortem bank nung teyaritsü tim mangur. Iba ama tensa ka nung bank tem privatise süra, timtem talila

angutsü" ta paisa shisem. AIBOC secretary-i state bank kettangsertem ajurutepa sendentem amen aser idangji benoka jembiba onüktem national jenjang nung benoka lemsateptsü ta pai nangzük.

D. Thomas-isa Business Association of Nagas (BAN) den ajurutep aser idangji BAN züngsemtemi shishilembaba

maparen inyaktsü atema bank tem nungi loan agitsü asoshi tetsükdaksü ajuruba khuret lemsatop.


BAN züngsemtemi Dimapur nung centre ka lapoktsü tebilemba lemsatop aser ibaji paia mulunga agizük. Iba centre ajanga entrepreneur teyari angutsü ta D. Thomas-isa shisem.




Temang anema alibaren ya lokti nem metetdaksüba maparen ka kumdaksütsü merangba mera ka

"Intensified Diarrhoea Control Fortnight"


12th - 24th June 2017




Tanur ka Diarrhoea agi kangshidang teinyaktsütem




ORS packet tuluka pongdang temerük ka nung tzü tajemtsü litre 1 den meyoktepang



ORS ji mapang shia, talisa tepok aoba shia spoon agi 50-100 ml jemdakjang




Tepok aoba anenyonga Zinc tablet ka spoon ka nung tzü mesüra tetsü mamatzü den meyokteper jemdakjang




Tepok aoba mapang mesüra anenera tetsü mamatzü den tanga chiyungtsütem agujang. Tepok aoba mapang aser iba sülena mamatzü yongdakjang.

Tanur dak Diarrhoea nokdangtsü atema







Sorochiok masü dang, chiyungtsü magütsü dang aser tanur mang merükmejuba sülen tamasa nü teka sapon agi shidokang



Tanuri kozüba scü tekaratiba nung endokang. Latrine nung scü kozüdakang aser merükmejua yuang

ORS & Zinc tablet angati angutsü atema ASHA den tongtepretepang

website: [MOHW - http://www.moh.gov.in](http://www.moh.gov.in) | [ASHA - http://www.asha.gov.in](http://www.asha.gov.in)

dawp 17102/13/0006/1718

FKJGP Ienir kati kinungtsü tenu zükset

Tura, June 13 (Agencies): Whistler Marak ta jangjaogo. Kanga dang taoksatsü osang ka nung Federation of Khasi Jaintia and Garo People (FKJGP) nung adviser kati June 12 nü nikongtsütsü 3:30 ako shi nung North Garo Hills (NGH), Kharkutta PS kübok Mendima Bakra yimtsüing nung pa kinungtsü tenü tetsür ka tepset, ta aitsüogo.

Whistler kinungtsü aser la tenu na mangatetep adoka asatepba sülen pai la dak azük, ta osang ajanga metetdaksü. Aibelena alisang ya Bajengdoba tesem nungi lir aser pa iba yimtsüing nung kibong küma liasü. Pai la tepsetba sülen jena oadok aser iba ken o benokba mapang tashi nung monguteti lir, ta kasa osang ajanga metetdaksü.

Whistler kinungtsü aser la tenu na mangatetep adoka asatepba sülen pai la dak azük, ta osang ajanga metetdaksü. Aibelena alisang ya Bajengdoba tesem nungi lir aser pa iba yimtsüing nung kibong küma liasü. Pai la tepsetba sülen jena oadok aser iba ken o benokba mapang tashi nung monguteti lir, ta kasa osang ajanga metetdaksü.

Aitsüa alisang tenüing ya jangjaogo.

Mizoram tzümettsüing nung nisung 8 asü

Aizwal, June 13 (Agencies): Mizoram, Lunglei district kübok Tlabung tesem nung tzümettsüing arua nisung 8 tepset aser pamok 6 samara mongoteti lir.

National Highway 54 koba ajanga state Assam den sendakteper iba lenmang ya Lunglei, Siaha, Lawngtlai, Serchhip aser Champhai district tem nung anentsü aluba ajanga nokdangogo, ta ketdangsertemi metetdaksü.

State nung tesem balala nung yashi nungi tenzüka tang tashi nung ki 350 tzü agi metsüingbangogo, ta State Urban Development & Poverty Alleviation Minister Zodintluanga-i

metetdaksü. Khawthlangtuipui ayong mobanga atuba ajanga Tlabung jila nung ki 74 metsüingbangogo. Public works department ajanga ashiba agi, kibong 84 iba tesem nungi anienogo.

Thenzawl tesem nung school tem dena shibangogo aser ki 6 tashi metsüingbanga lir, ta ketdangsertemi metetdaksü.

Anentsü aser tziunglu sashia aruba ajanga Aizwal jila nunglenmang aika nokdangogo aser power supply line tem tokdangba den külemi telecommunication nunga timtem adoka lir.

Chiyongtsü tajung nisung ajak nem agütsütsüji tamakoktsü masü...

ATTENTION TAXPAYERS



Asenoki tejakleni arua iba maparen takok ka kümdaktsüdi

ADVANCE TAX 1 buba instalment agütsütsüba anogo tatembangbaji June 15, 2017 lir.

Advance tax agütsütsü asoshi mapang aser anogo

| Due Date | Amount |
|---|----------------------------------|
| a) On or before 15 th of June, 2017 | 15% of the Advance Tax payable. |
| b) On or before 15 th of September, 2017 | 45% of the Advance Tax payable. |
| c) On or before 15 th of December, 2017 | 75% of the Advance Tax payable. |
| d) On or before 15 th of March, 2018 | 100% of the Advance Tax payable. |

Advance tax magütsüba mesüra tarutsü nung agütsütsü asoshi anüingdaka ayuba ajanga tetemlok tali akümtsü.

Tax agütsürtem shirrok ADVANCE TAX agütsütsü nungdaker.
Any assessee, including salaried employees, whose tax liability for the financial year is reduced by the tax deducted/collected at source in ₹10,000/- or more.

Tax magütsütsüpurtem
Resident Senior Citizen (individual who is of the age of 60 years or more) and having income from business/ profession is not liable to pay.

Tax agütsüba yimya

e-payment is mandatory for all Corporates and also those assesses whose accounts are required to be audited u/s 44AB of the Income-tax Act.

e-payment is convenient for other taxpayers also as it ensures correct credit.

Find us on :

@IncomeTaxIndia

Visit : www.incometaxindia.gov.in



Income Tax Department
Central Board of Direct Taxes



TIR YIMYIM

YIMOBILEM (EDITORIAL)

DIMAPUR WEDNESDAY, JUNE 14, 2017

Alima lendong asoshi renema lidi

Tesem tesem nung tsünglu kanga arur, yipru aiter aser menoknok anoktsüba tesem nung asenok alir. Iba ama mapang nung asenok renema alitsübaji kanga nüngdaker. Ibaji atema government kanga shisa bolutsüla aser ajungben alima lendong ataloknunga jet ta lendong atalokba tesem tonga oagi yaritetsüsa nüngdakba nübo aser oset ajak zep ta renema alitsüla. Iba osang züluba mapang nunga Mizoram yimtiba Aizwal nungbo tsünglu kanga aruba ajanga ki karbo anenzüka aoba osang angashi. Iba kasaji Nagaland nunga Mon town nunga ki karbo anenzüka aoba otsü angashiogo. Iba ama lendong, talisa, tenem nung küma aliba yimti Kohima aser Mokochung nung atalok nungbo koma asütsü ta kanga shisabolua bilemer. Tenem nung yangluba kitem ya longren longpang tupoka lenden kümdaktsür yangluba kitem teimba lir. Ibaji dang masü saka government-i repranga tasazük aser telatet ozüng kar agütsür yangludaktsüba masü saka ki kiburtemi pei mulungba nung yangluba kitem lir. Aji oda, tenem nung long ki tulu aser talang amentepa yanglua aliba ya engineer mongintem shisatsü agia yanglubaa masü saka tsümar kisürtem mulungba nung yangluba kitem lir. Iba kasaji lenden lima Dimapur nunga Town Planning aser Municipal tetuyuba aser talenba kecha mali pei sünütsü süyonga atuba joko karibo azüklen takdang terben tashia atongtepa yangludagi. Itemji ali agi mesüra tongshi agi makok chirep nungbo iba kidang alirtem dang masü saka kidanger kitem dena chirepa lendong tulu ataloktsüba tia nung asenok aika lidagi. Iba amaji tang ama tsüngluruwa mapang ya tesem aika nung anentsü alutsü, yipru tulu aittsü aser menoknoka anoktsüa akok. Ibaji ajak asoshi shisabolutsüka lir. Ajisüaka, asenok asoshi ano iba dang nungi shisabolutsü tuluba kaji, tawa Nagaland Chief secretary-i Nagaland nung tamangu alima lendong atalokdang yariteptsüsa government renema mali ta metetdaksüba osang to asütsü. Tanü Nagaland nung tesem aika nung kitsükkirong lendong nung jet ta oagi yaritetsüsa fire brigade pur ket nung gari peria maka. Anarongdena district headquarters nung mi insepba gari kaka anana kar asütsü. Item jagi district headquarters alema orr yimtsüngtem nung kitsük kirong atalokdang mapang shitak nung tonga oagi meyariteter. Iba tia nung Nagaland tesem kar nung kiyong ka anenzüka orr asüama aser yiruyipong aser timtem takoksa ajurutsüsa atalok nungbo Nagaland government-bo repranga atatsü asü (?) ta asüngdanga aritepa inyaktsüba mapa aika lir. Alima nung alir asünungji, ajungben lendongji tajurutsübasa, anungji government dang masü saka nisung ajak renema alitsüla. Alima lendong timtem atalokba mapang mezüng teinyaktsüji tasürtemji kong ayutsü, yiruyiponga alirtem kong bener oa anepalutsü aser ki makartemji kong jenokdaktsütsü ta asüba tebilemstütemji asütsü. Anungji, ki chirepa aliba telongi irr yangji aliba nisungtem anitetter külenang, yirua alirtem mozü kidangi bener aotsüba mapatemji yakta dang telemtetba agir inyaktsüba mapatem lir. Ajisüaka, item mapatemji inyaktsü nisung renema melira aser government mozü kidang yiruyiponger yaritsüsa nüngdakba mozütem den tayarir peira melira, nisungtemji repranga südaktsütsüba dang asütsü. Ashiko, asenokibo kitsük kirong lendong nung amshitsü gari alia ayutsü agibo iba senji lema agidi asütsü, aji oda mozü kidang taneptsü angutsüsa tipdema renema ayutsü agibo asen alitsü kiang tajung ka asütsüang bilemstüa akok. Tang asenoki yimitem nung motzü aodak ali agi nembanger yangji ki asür. Akhidang motzü yimokba ayong dena nemdang ki tulu aser talang yanglua lir. Anungji, tsünglu arudang motzü taodak maka yimti yimdong agi awatsüng akümer. Aji oda, asenoki kilentsü merüka ayutsü melen kilentsü nung asen kidang okdenba janarüja aser süoshi aser oset tejen ajak tokoktsür. Iba jagi kilentsü nung motzü moutet yimdong nung ayimer. Item ajakji asenoki asenoksasa lendong meshiba mapatem lir. Item ajakji bilemdanga, tang nungibo kechisüdirsüaka menoknok anokyonga aser yipru aityonga kiojen melaotsü aser meraksatsüsa ajaki bilema renemstüla. Iba denji goverment nung alirtemi nübortem lendong mapang kümzüktetsüsa aser yaritetsüsa renema lir ta shitetsüla !

OLEMSABANG

'Kütsü Sarasadem' ken nung tai aliba medongshidi Correction of unaware, unforeseen, unrealized errors

- Tsüknung Penzü, Dimapur

(Taoba adok nungi...)

Onenlepten (Commentary)

1. Iba ken stanza 2, verse iii & iv nung, 'asür-i atenba ken' ta agüja angur. Yangi 'asür (dead persons) ta asüba ya kotak tenyar-a masü, shir indang ashir-ar AOKK ken nungji shia mali. Kentener ratadaktsür.
English nung, ken mejemeri ashibaji abensaja ni kü suggestion translation nungji agütsüogo. Yangi 'asür ta ashiba ya :- Temalen asürtem : kibong nung kinüngertem, jala-nula- sosem dangsem (relatives) aser temeimba tembatinurtem.
2. Ken tenting melener :- 'Na koda tembar tajung' ta AOKK nung alibaji. 'Yisu tembar tajung ta tenüng nüngjem aika mesüktepa AOKK nung angur. Anungji Index bushidang maitepi, melamelaa bushitetsü atema. tenüng tatsüba aser ken nung first line. 'Oh ku kümtetba' ta ni melener.
3. Stanza 2, Verse v : 'Yonder mansion = oagi ki tajung', aser verse viii : 'beautiful shore = tzüküm külenji ta ojang anapronglaji Ao nung masemer. Anungji ana rongnungji ka dang shimtetsüla (alternative choice). Alemlü ken meyiper temi. 'tzüküm külenji' ta meyipba angur, ya parnoki kanga shisa ka-a meyipogo. Anungji ni-a 'tzüküm külenji' ta amshir.

Ken No. 230. Zion Leni Odar (We're marching to Zion) S.823. BH.8

Stanza 2, Verses i & ii

English :- Let those refuse 10 sing / Who never knew our Cod;

AOKK Text

Shiri Pa memetet

Kenji tetendaktsii ;

Saka kotak Chuba Chiri (2 ben)

Tepela san.gdongang (2 ben)

Kü suggestion text

Shiri Pa memetet,

Kenji metennütsü.

Saka kotak Chuba Chiri (2 ben)

Tepela sangdongang. (2 ben)

Onenlepten (Commentary)

Shiri Pa (Tsüngrem) memetet parnok dangji. "Asenok külemi ken tendi arung" ta aja nung parnoki. "Ma, marutsü" ta langzütsü. refuse asütsü. Parnoki kodang Pa meteta kümdir idangjibo parnoki ken tendi ta ashitsü. Saka tangbo odang parnok nem "Maa" ta-ji shidakjang. 'Let them refuse to sing'.

Iba temalen agütsüba olen-osü nungji iba ken ya mejem. Iba ken mejemsang Isaac Watts ya England nunger. 1674-1748=75. Iiasü. Pa ya psychology azüngba, metetba; Latin, Greek, Hebrew, French oshitem metetba aser ken mejemer ka. Pai mejemba ken aika tang AOKK nung lir.

Item rongnung : "Kümtetba azü ayim no ?" ta ken no. 27 ya-a ka lir.

Ocet tatem O


- (1) Alima nung tetsüi asoba nübur, tanur-tain ajak asoshi : "Kütsü-i sarasademtsür" ken ya kanga nüngdak.
- (2) Iba ken 'Mothers' Day' nung dang masü, küm piyong atentsü nüngdak.
- (3) Ya tabensaba nung yanglushir kibong shia nung teti tenshiba ken ka kümdaktsüdi.

Iba Olemsabang nung lemsaba ken-o aser shisatsü ya iba ocet zülur-i bilemba ken-o ama tazünger-i angateta agitsü mepishir



Diphupar 'B' Ao Baptist Arogo nung 10-11, June 2017 tashi Women Ministry-i achaayanga Yimten Yimsüsürtem atema shisatokden sentong ka agia liasü. Omenji "YIMSÜSÜBA PANGTAKJI TSÜNGREMI LATETTSÜBA" Rom 13: 1 nungi Dr. Sunep Imchen(Mangmetong) ajanga lennir kaji ochi aser ajemalu jakla aser Tsüngrem O nung amendaker bendanga agüja tenzükbaji dang temoatsü lir ta shisalen sayua liasü. Teyanglur Tsüngremi lenir taküm aser kibong nüburtem aika asoshi tali moajangma aser iba sentong nung shilem agirtem dang kanga pelar, ta S. Achila Lemtor Asso.Pastor, Women-i sangdong ka nung metetdaksü.

Pastor Eugene Cho aser NBA Star Jeremy Lin nati teküp ayokertem yaritsü



Seattle, June 12 (Agencies): Pastor Eugene Cho aser basketball star Jeremy Lin nati Thailand nung tetsür teküp ayokba indang maparen osang metettsü aser takoxa ajururtem yaritsü atema semdang.

Cho ya Quest Church, Seattle nung sannüker ka lir aser pai NGO ka tenzüka lir. Lin ya NBA asayar tajung ka dang masü saka

pa Khristan tamang atema mapa jenti inyaker. tenaprongi tetsür teküp ayokba maparen azüoktsü aser yariteptsü atema mapa inyaksü jangrar.

Cho-i One Day's Wages ta ser NGO ka tenteta lir aser ibaji meteta Lin-i Cho den sensakertem yariteptsü atema asüngdanga liasü, ta Relevant Magazine ajanga ashi.

Cho-i Lin den Thailand semdangtsü mulunga agizük aser iba osangji Instagram nung lemsatep.

2016 report ka nung ashiba agi, Thailand nung nisung 423,500 shi ka alar tia nung alir aser ibaji linük nütsüng yongsük nung shilem 0.63 shi lir.

Lin-i pa indang tamangba yimsü indang jembia arur aser pai The Christian Post den sensaksem dang, "Khrista den tesentaktep ayuba ajanga asen taküm nung temelenshi adodaktsür aser tangatetba melenshitsu. Nisung aikati iba ya arogo, iba ya Tsüngrem, iba ya kü taküm aser iba ya kü mapa ta lemsar alir. Saka chichiba tamangibo nü taküm nung item ajak ka ka kümdaktsür" ta ashi.

ANOGO ABEN TSÜNGREM DEN

TASHI ANAGA AMANGBA NUNG TAKOKTSÜ LIR

'Kodang Isarael nunger aji angu, parnok kati ka den jembitepba ashi "Ya kechi?" kechiaser parnoki aji kechiar memetet liasü. Mosai parnok dang ashi, 'ya nenok Kibubai agütsüba chiyongtsü lir.' - Anitet 16:15

Kodang Moasi Isarael nunger meyi aika Egypt lima nungi anir adok iba mapang nung parnok aika mulungjang nung bilemer alitsü, 'ni kechi agi mesütsü? lisem lima nung ni kodasür taküm alitsü' pongmangtem jia mejungi pongmang südi. Lisem lima nung nisung paikaji mesütsü asoshi chiyongtsü aser tzü mezüngdangtet nüngdaker aser aji kong nungi arutsü? Ibai tamakoktsü tia saka Tsüngremi agütsü aser parnok mesü. Meilungi parnok taküm nung kechi atalok? Anogo shia parnok taküm nung Tsüngremi tesüngmangtsü mapa inyakbatem amadok. Anogo shiaji Tsüngremi sayatenya tesüngmangtsü lir.

Anogo ka süitema oteta jajabaji Tsüngremi sentsüwangshi asoshi lir. Isarael nungerang masü saka tanü asenoki dak Tsüngremi sayatenya tesüngmangtsü mapa inyakba amadoker, tongtipangsa tekümteta amadok. Anogoshia asenoki mamadoki ya shidi, 'oh, kü nem agütsüba ya tesüngmangtsü temeim tulu.' Tashi angadi-amangdi, Pai asenok mesür.

SARASADEM:

Ajak agütsüsang Tsüngrem, tanüa ni asoshi tesüngmangtsü kechi lir iba nung ni tashi angadi. Amen

North Korea nung tambur ka züka merenshi

June 13 (Agencies): North Korea nung tambur ka China nung par Khristan kinungertem den ajurutepa aruba atema ketdangsertemi züka merenshi, ta Christian Today ajanga metetdaksü.

Arishi küm 61 tain Kim Seung-mo ji China nungi North Korea-i meyipa aruba sülen anogo asem lir ketdangsertemi apu.

"North Korea nunger China-i orr arur ajaki ketdangsertem parnok senzusenbongba indang osang tejangja metetdaksütsüla. Kim ji itdangitaba onük nung tai tongloktsü, kechiyong pai par kinungertem Khristan tamangertem lir aser arogo

sannükeri pa yari" ta nisung kati ashi.

"Kim ji züngzü agi alen aser züka merenshi. State security ketdangsertemi pa Wiyon train station jakdang pur atsür aoba ni angu," ta paisa shisem.

Parnoki Kim indang tenük aser tetsüng yirutsü aser ano temang nung zübo aika keta lir.

Ministry of State Security ya North Korea yimsüsür Kim Jong Un indang police force lir aser parnoki taochi kecha melii dang mapa inyaker.

Khristantem reshikangshi ajuruba linüktem rongnung North Korea ya mezüngbuba jenjang nung lir ta Open Doors' 2017 World Watch List nung shia lir.

Merangkong Medemsangser Putu Lanu Shisadokden sentong agi

Dimapur, June 13 (TYO): Merangkong Medemsangser Putu Lanu Shisadokden sentong Merangkong Laishir Telongjemi ayonga June 10-11, 2017 Merangkong yimtiba nung "Ochi Nükmen" omen nung ajemdaker agi aser iba sentong nung yimsüsür 85 dena sentong kanga takok ngua agiogo.

Shisatokden nung shisa tuyurtemji Dr. Aotoshi, Pro Vice chairman Delhi Public School, Dimapur aser Mr. I. Nükshi Jamir Rtd. Deputy Director Education na liasü.

Shisa tuyur ajanga yimsüsüba mendenji Tsüngremi shimba aser iba menden nung amenertemjia Tsüngremisa shimba, anungji ajaki iba ochiji mezüngmeshi mesü ochishia pei taküm azüoka yimsüsüa ochi nükmen meraksadaktsütsüla ta sayua liasü.

Ochi nükmenji nübur tsüngdang mapa shitak inyakba agi peritsür masü saka Tsüngrem tsüngdang kija taküm ochishia meshiteta alinung dang perir ta yimsüsürtem ajaki pei taküm azüoka alitsü akangakanga ajungshi.

Alemla Otsüla aser Oboula nunger mapang yamaisa inyak anungji tanüa yamai asütsü ta mesü tanü temetetba lima nung alir asünung Rehoboam mapang tambur shisa magii aibelen lanur shisa agia yimli raksaba ama masütsüsa tim nisungtem den shisa agitepa koba inyaksü tim



aji inyaksüji kanga tongtipang ta parnokisa shisem.

Kasaji aluyimba tsütsü alemla ama küm ana yimer shi azü belema ano min tulu leppokba aluyima ama mesü tanü kechi nüngdaker, kong küm 30 mesüra 40 bo sa aayangtsü akok aser kong takoksa mali aji meteta inyakra asen Merangkong nunger kecha agia manüngtsü, kechiaser alinük peria yateta yutsüa lir ta shisalen sayurtemisa ashi.

Merangkong ya Tsüngremi ajioka yokba yim ka lir, anungji tanü tashi lendong balala nungi mapang jelia asenok kümzüka ayur, iba temoatsü maneni agitsü asoshi yimsüsürtemi ochi nükmen mesamadaktsüi yimsüsütsüla ta tenatisa ayongzük.

Tanü joko sorkar dak dang metaloker lira aiben tebilemba mataloktsü aser pur memenepi yimsüsüba menden nunga anisüngzük makatsü; aser kodang yimsüsüba Menden nung anisüngzük makalir, nüburtem

asüktemtsü. Anungji yimkong yimji yimjung nung alitsü asoshi yimtsüng nübur ajaki pei inyaktetba mapabo inyaka sorkari kechi agütsür ta mesüi, inyaka chiyunga alitsü tenzüksü mapang ta shisalen sayurtemisa ajungshi.

Yimsüsürtemi pei kija kibong asoshi dang bilema yimsüsüra kodanga lokti nung telongjem makatsü aser yimtsüng nung temoatsü makatsü; kechiaser ochi nükmen ta kodang südir, yangi yimkong asoshi inyakba dang ajar. Anungji yimtsüng nübur asoshi aria bilema yimsüsürtemi pei akoksa aka nübur anisüngzükra aji kü tejangraba ta tenzüksüla ta tezüngkangtsü o agi shisa tuyua anganütsü.

Deobar nikongdang Merangkong nung telen balala nungi lennirtem aser tongti nisung kar densema O lemsatep mapang agia liasü.

Iba mapang koba menden südir süang telongjem makaba

mendenji ajaki mezüngmeshitsü, anungji shiba südir süang, ni shitak lir asü masü ta ajaki shisadanga pei bilembaji dang ta mesüi, atsü anem ka-a alimai kechi aginür aji angateta inyaksü tim ta sensaksem aka.

Yimtsüng nung rongsenkettsüng tsütsü joko asenoki sorkar developmental project dangsa mesüaka Merangkong lushi National highway kilometre 20 tema ajangba maangka amshia ali den apet tsünusenbong balala lenmang anasa alirtemi danga süa inyakra rongsen lenmanga peria lir ta temolungdangtsü sensaksem o jembia.

Ano tanü asen lima nung rongsenkettsüng telongi aiba aser ano nübu tajung aika anojungi taküm tembangba ya achiajem buluba ajanga lir; anungji tarutsü putu nung yimsüsür tajung Tsüngrem metetba aser ochishir adoktsü nükla nung Yimten aser Arogo teka amteper küm ishika

tsüngda nungbo Merangkong lushiji "Alcohol free zone" yanglutsü ta akangakanga sensaksem aka.

Alima yimsüsüba tsütsü koba yimtsüng nungi südir süang Tsüngrem tsübuba, nübur meimba aser sobaliba tajung alir nisung shimtetra asen Nagaland Government mejungiang malitsü. Anungji nübur ajaki aji angateta constituency ajak nung ochishia inyaksü nüngdaker, kasaji asen Merangkong nungeria asen constituency asoshi shiba aser koyimer südir süang, ochishia Tsüngrem akhümtsüba aibelen mesü lenir shimra asen lima terenlok shitak arua nübur anisüngzük angutsü ta jembia iba o lemsatep tembang.

Maneni Merangkong Medemsangser Putu Lanu, Merangkong Baptist Arogo aser Merangkong Laishir teka amteper Tsüngrem tsübuba nung Tanülar lensaer Asür Longjanglepzük tsüngsü nung anidaka Merangkong tamajungba tia ajak nungi kümzüka ayutsüsa telongjem nung mapa ajak inyaka aotsü nükla ayur.

Tsüngremi Merangkong Senso shirisa iba sentong asoshi tamang sarasadem agütsüogo moajang. Tsüngremi Merangkong Medemsangser Putu Lanu moajang ta Merangkong Laishir Telongjem Tir-i sangdong ka nung metetdaksü.

OLONG PAITEP # 4450

| | | | | | | | | | | |
|----|----|---|----|----|---|----|---|--|---|----|
| 1 | | 2 | | | | 3 | | | 4 | |
| | | | | | 5 | | 6 | | | |
| | | 7 | | | | | | | | |
| 8 | | | | | | | | | | 9 |
| | | | 10 | | | | | | | |
| 11 | | | | | | | | | | 12 |
| | | | | | | | | | | |
| | | | | | | | | | | 13 |
| | 14 | | 15 | 16 | | | | | | |
| 17 | | | | | | | | | | |
| | | | | | | 18 | | | | |

TIPLÉN

- 1. Ki temalen - (5)
- 5. Aonsotsü tasa ka - (6)
- 7. Tenarong maten - (6)
- 11. Jabaso masü - (4)
- 12. Te _ _ _ _ ng - (4)
- 15. Asüngdangba ashi - (6)
- 17. Salang / Kimalen satem atemba - (6)
- 18. Mi nung atsük - (5)

LANGTSÜNGLEN

- 2. Tanemi - (4)
- 3. Nisung ishika - (3)
- 4. Talang masü - (3)
- 5. Tesülen-i ao - (9)
- 6. Süng-i yangluba auso - (6)
- 8. Angatet - (5)
- 9. Amangbapur tentet - (5)
- 10. Tenük agi manguba taküm - (6)
- 13. Süng lanu - (4)
- 14. Ali nung alang - (3)
- 16. L _ _ _ r - (3)

OLONG PAITEP # 4449 TELANGZÜBA


TIPLÉN :

- 2. Asangwa, 4. Kasa, 6. Temopu,
- 7. Sayu, 8. Sang, 9. Ibai, 10. Juli,
- 12. Temeja, 13. Aisü, 14. Pongsen.

LANGTSÜNGLEN :

- 1. Jakla, 3. Anungji, 5. Angu,
- 6. Techira, 8. Shiotep, 12. Jara,
- 13. Lemsä.

Noksa nung meputepi aliba tesem 10 bushiang



TANÜBO NAI LANGZÜANG

Q: France nunger highest civilian award "Legion of Honour" atema India nunger shiba shima lir?

- [A] Amitabh Bachchan [B] Shahrukh Khan
- [C] Soumitra Chatterjee [D] Kamal Hasan

(Taruba adok nung onoki langzüsü)

YASHI ADOK TELANGZÜBA : Virat Kohli

Tanur asoba anogo nung salem osang den noksa angali adokdaksünürä - Tenüng, Küm, School, Talidak & salem osang tejanga züfür, noksa (photograph - any size) ka den anogo 3 meöura 4 jela e-mail : tiryimim@gmail.com nung yokang meöura Tir Yimiyim bureau tem nung agüjang.

Tepela Tasoba Anogo



- 1. Tenüng :
- 2. Tasoba anogo:
- 3. Küm : 4. Class :
- 5. School :
- 6. Talidak :
- 7. Salem osang :

NAIA YA METETER MA



Club DJ rongnung tanobotisang

Arishi küm 6 tanur tebur chanu kati Japan nung aliba restaurant ka nung ghonda ka tashi DJ shilem agiba sülen alima nung club DJ rongnung tanobutisang Guinness World Record pai yangluogo.

Arishi küm 6, Itsuki Morita-i professional DJ decks amshia track aika tema liasü. Tetsüi mezüng pa dang DJ mix asütsü tesayuba agüja liasü.

SUDOKU # 3563

| | | | | | | | | |
|---|---|---|---|---|---|---|---|---|
| | 9 | 3 | 7 | 6 | | | | |
| | | | | | | | 1 | |
| 5 | | 8 | 3 | 9 | 1 | | | |
| 3 | 1 | | | 2 | | | | 5 |
| 8 | 6 | | 5 | 3 | | | | |
| | | 5 | | | | 8 | 3 | |
| 9 | 3 | 5 | | 1 | 7 | | 6 | 2 |
| | | | 4 | | | | 8 | |
| | | | | 4 | 6 | | | 7 |

TELANGZÜBA # 3562

| | | | | | | | | |
|---|---|---|---|---|---|---|---|---|
| 2 | 6 | 3 | 4 | 5 | 1 | 9 | 8 | 7 |
| 8 | 1 | 9 | 2 | 6 | 7 | 5 | 4 | 3 |
| 7 | 4 | 5 | 9 | 8 | 3 | 2 | 6 | 1 |
| 5 | 2 | 4 | 7 | 1 | 6 | 3 | 9 | 8 |
| 1 | 3 | 7 | 8 | 4 | 9 | 6 | 2 | 5 |
| 9 | 8 | 6 | 5 | 3 | 2 | 7 | 1 | 4 |
| 3 | 7 | 2 | 1 | 9 | 4 | 8 | 5 | 6 |
| 6 | 5 | 1 | 3 | 2 | 8 | 4 | 7 | 9 |
| 4 | 9 | 8 | 6 | 7 | 5 | 1 | 3 | 2 |

OJANG LUTEP # 4058

- ISUNNG : □□□□□□
- KAAIJ : □□□□□
- ONAGKAM : □□□□□□□
- AURNG : □□□□□
- AASK : □□□□
- NNIGSU : □□□□□□
- ARKI : □□□□
- DAGN : □□□□
- IJIBA : □□□□□
- EAGTRITE : □□□□□□□□

OJANG LUTEP TELANGZÜBA # 4057

KIBONG NUNG TANURTEMJI SENMANG LIR SAKA MAZÜOKRA KHURET BENER ARUTSÜR

Anü ita petinu ajanga alima nung tsüngsang mopung melenshidaksüba ama nisunger tia-a melenshidaksür ta anü ita petinu tetzürtemi ashir, parnoki ashibaji shidak asü tai'ar nai-a na asoba ita anogo den tanü nü tia medemdangang (Horoscope):



Aries
21/3-19/4

Tanü nai tarutsü asoshi junga shisadangtsü merangang. Nai tanü ajak den sadoka o jembitettsü. Tenangzükba kecha magitsü merangang. Nikongdang 3:00 nungi 6:00 ako mapangji na asoshi tajung asütsü.



Taurus
20/4-20/5

Tanü nü tia junga alitsü. Nisung ajak den nü tesentaktep junga alitsü. Maparen tasen tenzüksü asoshi anogo tajung ka asütsü. Lokti nung nai shilem tajung agitettsü. Tangar den o lemtepbaja ajanga na ajangzüksü.



Gemini
21/5-20/6

Senotsü kümdanga ketdang asütsü merangang. Nai meima alirtem den sensaksemba ajanga nai tesünep angutsü. Nü dang nungi temaba jenjang nung alir dang nü mapa tajung sayutsü asoshi nai maongka angutsü.



Cancer
21/6-22/7

Nüngdak makaba nung tangar den mangatettep madoktsü merangang. Tongtepratep agitsü asoshi anogo tajung ka asütsü. Senotsü dak sentakba tezüngzüktep agitsü asoshi anogo tajung ka asütsü.



Leo
23/7-22/8

Nü libaliro junga azüoktsü merangang. Tang ya nü tamendakdak yanglushitsü mapang tajung ka lir. Nü tangatetba nungi masetshitsüla, ibaji ajanga nü tarutsü tia latettsü.



Virgo
23/8-22/9

Tangar den tesentaktep raksa aliba nai yanglutettsü. Kibong dak sentakba osang tajung kar nai angashitsü. Maongka kar anguba ajanga nü sentong nung temelenshi kar adoktsü.



Libra
23/9-22/10

Jakla tamajunger dang nungi jenbua alitsü merangang. Tangari asaya-menübaji nai süoki yia magitsüla. Nü molungjang nung terata aliba kar asoshi nai lenmang angutsü. Nikongdang 2:00 nungi 3:00 ako mapangji na asoshi tajung asütsü.



Scorpio
23/10-21/11

Tatidang ajak koktettsü merangang, ibaji koktettsüsa nü dak molungsentsü lir. Tanü na mesüngjemteti alitsü. Tensa kar ajanga nü tangatetba melenshitsü. Medemer ka den nü shisa lemsateptsü merangang.



Sagittarius
22/11-21/12

Mapa ajak kümdanga inyakttsü merangang, aji oda mesüra na yiru-yipongtsüa akok. Medemer kari nü mapa nung yarisemtsü. Tongtipang mapatembo tanüsa inyakttsü merangang.



Capricorn
22/12-19/1

Nai sadoka jembiba ajanga tangar molung akoktsü. Nü dak ajungmesoba tanela ka alitsü. Medemer kati sayutsüngiba ajanga na ajangzüksü. Nai maongka tajung ka angutsü.



Aquarius
20/1-18/2

Nai tangar molungsentsü angutsü. Tangari na molungsoa yaritsü. Senotsü nung tia junga lir. Tangar khuret mebenzüksü merangang. Tanep 8:30 nungi 9:45 ako mapangji na asoshi tajung asütsü.



Pisces
19/2-20/3

Nai tangar o koka jembitettsü. Nai meima alibapurtem den tesentaktep yanglushitsü merangang. Nü o mekümdangra nai tangar molungsentsü yirutsütsü. Tanü nai mapa tasaka inyaktettsü.

Raabta film sayar mezüngbuba hopta sen crore 15 aazük



Mumbai, June 13 yanglurtem den mapang talangka atsütepa liasü.

(Agencies): Sushant Singh Rajput aser Kriti Sanon nati tongti shilem agiba film 'Raabta' sayar mezüngbuba hopta nung sen crore 15.39 aazükogo, ta film yanglurtemi metetdaksü.

'Raabta' ya June 9 nü sayaa liasü, saka iba film mesaya

tsüngda film otsü dak sendakba nung Telugu film 'Magadheera'

Film ya nisung aikati kanga sapua agizükogo aser tesem ajaklen nungi tenüng asangba osang aika aruogo, ta film yanglurtem tenüng nung osang ka ajanga metetdaksü.

Iba film ya Dinesh Vijan-i direct asü aser film sayaba anogo nung sen crore 5.61

aazük, iba sülen Honibarnü sen crore 5.11 aser Deobarnü sen crore 5.21 ta tang tashi nung ajangetetogo

Raabta film ya Sushant aser Kriti na külemi shilem agiba mezüngbuba film lir.

Tang tashi nung film review jungrarabo masü aser trade analyst Taran Adarsh aser Komal Nahta nungeri film asadanga yimya nung aonungbo film kangabo takok mangutsü amai reprangteter.

"Kanga tezüdangtsüka," ta Raabta dak sendakba nung Nahta-i tweet asü, kasa mapang nung Adarsh-i ashiba agi, "Kanga tamajung. Film otsü junga mezülü, direct asüba yimya majung aser acting kanga tamajung" ta ashi.

Shania Twain-i küm 13 sülen London nung shilem agitsü 'Life's About To Get Good' ken June 16 nü sayatsü

June 13, 2017: Canada tsür nüngtugu kentener, Shania Twain-i joko alima sema kenten sentong nung shilem magitsü ta lasasa nangzükka liasü, ajisiüka küm 13 sülen lai UK concert nung shilem agitsü, ta sangdongogo.

September 10, 2017 nü lai BBC Radio 2 Live, Hyde Park nung Blondie, Take That aser Emeli Sande nunger den külemi shilem agitsü.

Iba osang twitter ajanga sangdonga Shania-i, "Taküm @BBCRadio2 Live, Hyde Park nung ni shilem agitsü! Asüng nungi ticket ayoktsü, London nung nenok atema shilem agitsütsü ni yongyar," ta lemsatsep.


2004 küm sülenbo Shania-i 2015 nungang Rock This Country tour nung shilem agia liasü.

Iba mapang nungji Rolling Stone den jembidang lai, "Iba ya tesüsabuba tour lir, anungji ni tajungtiba agi shilem agitsü," ta metetdaksü liasü.

Tawa Shania-i la indang single, 'Life's About To Get Good' sangdonga liasü.

Lai, "Iba single ken, 'Life's About To Get Good' June 16 nü sayatsü, aser kensepji August tatemlen sayatsü," ta metetdaksü.

Taküm April ita nung lai 'Life's About To Get Good' ken ya mezüng Stagecoach Festival nung nisung 50,000 matsngdang tena liasü, aser lai iba ken ya tan Hokolbarnü (June 16) nungi alima tesem ajaklen nungi download sütettsü, ta sangdongogo.



71 buba annual Tony Awards sentong nung Josh Groban-i anir U.S. Musical "Natasha, Pierre & the Great Comet of 1812" aidang agiba noksa ka angur. Iba musical ya Tony Awards atema telemsa 12 nung züngsema liasü. Sempet aika anguba kentener Josh Groban-i Broadway nung Pierre ta ser shilem agitsü tenzük aser July 2, 2017 nü pai "Natasha, Pierre & the Great Comet of 1812" musical nung shilem agiba toktsütsü.

TAN HOPTA ATEMA - KOMA SÜLA ?

Q. Center sorkari nashi maleptsü ozüng latetba ya magienra, Nagaland India kübok malitsü ta Nagaland nung aliba lokti tentetemi ola adok nunga koma süla ?

Olong 20 shi nung June 16, 2017 tashi nung iba telangzüba ya onok dangi e-mail - tiryimiyim@gmail.com mesüra SMS - 9856121232 / 9436072422 mesüra Tir Yimiyim Facebook account ajanga yokang. Telangzübatemji taruba Deobarnü adoktsütsü.

Shah Rukh, Salman, Akshay nung Forbes World's Highest-Paid Celebrities List nung züngsemogo



June 13, 2017 (Agencies): Nüngtugu Bollywood actor Shah Rukh Khan, Salman Khan aser Akshay Kumar nung Forbes magazine 'World's Highest-Paid Celebrities' list nung lir.

Iba list ya Forbes magazine-i Hombarnü sangdonga liasü. Bollywood superstar Shah Rukh

sen million \$38 aateta jenjang 65buba nung lir. Forbes-i metetdaksüba ama Shah Rukh-i 2016 küm sen million \$38 (crore 245 shi) aazüka liasü. Pai yaküm FAN aser Dear Zindagi film nung shilem agi.

Kasa mapang nung Salman-i jenjang 71buba ajangetetogo.

Pai 2016 küm tanga film den külemi Sultan amala film nung shilem agia sen million \$37 aazük aser iba sülen Akshay jenjang 80buba nung lir. Pai 2016 küm Airlift, Rustom, Housefull 3 film tem nung shilem agi. Pai 2016 küm ajak senteper sen million 35.5 aazüka liasü.

American rapper, singer aser kenmejemmer Sean Combs Forbes list nung sen million \$130 aazüka temaba jenjang nung lir aser iba sülen Beyonce Knowles tanabuba jenjang nung lir. Lai sen milliom\$ 105 aazük.

Maneni Virat Kohli-a Forbes' world's 100 highest-paid athletes list nung züngsemogo. Pa jenjang 89buba nung lir aser pai yaküm küm tsiungda nung sen million \$22 aazüka liasü.

Nokia 6, 5 aser Nokia 3 India nung sayaogo

New Delhi, June 13 (Agencies): HDM Global company ajanga Nokia phone yanglua ayoktsü temeden lir aser iba company ajanga tanü India nung Android aketba Nokia 6, 5 aser Nokia 3 sayaogo. Nokia 5 aser Nokia 3 ya Offline store nung angutsü aser Nokia 6 Amazon nung angutsü.

Nokia 6, Nokia 5 aser Nokia 3 Android smartphone ya taküm February ita Barcelona nung Mobile World Congress (MWC) 2017 mapang sayua liasü. Microsoft ajanga Nokia indang mobile shishilembaba agizüker Lumia series adoka aliba shibangba sülen ibai mezüngbuba India nung sayar.

Nokia 6 indang display ya 5.5-inch Full HD IPS aser 'metal unibody design' lir. Nokia 6 nung Corning Gorilla Glass den pixel density 403 ppi lir. Iba phone display tsünglanglen fingerprint sensor keta lir.

Nokia 6 smartphone nung Android 7.0 Nougat lir aser Qualcomm Snapdragon 430 chipset den 3GB RAM lir.

Iba phone indang internal storage ya 32GB lir aser microSD ajanga 128GB inoka amshitetsü.

Iba smartphone indang battery tashi ya 3,000mAh lir. Nokia 6 indang tesülen camera



ya 16-megapixel aser tejaklen aliba camera ya 8-megapixel lir. Iba phone ya sen 14,999 agi angutsü.

Nokia 5 indang display ya 5.2-inch HD aser Android 7.1.1 Nougat lir. Iba phone indang chipset ya Snapdragon 430 den 2GB RAM aser 16GB internal storage lir. Iba smartphone nung microSD ajanga 128GB memory amshitetsü.

Nokia 5 indang tesülen camera ya 8-megapixel aser tejaklen camera ya 8-megapixel lir. Iba smartphone nung Micro-USB 2.0 aser NFC amshiteter. Iba phone indang battery tashi ya 3,000mAh aser 4G LTE amshiteter. Nokia 5 phone nung 6000-series Aluminium built aser sentsü pezü - Tempered Blue, Copper, Black aser Silver nung angutsü. Nokia 5 smartphone jenjang sen 12,899

lir. Nokia phone tasen asem rongnung Nokia 3 jenjang talangba lir. Iba phone ya sen 9,499 agi angur.

Nokia 3 indang display ya 5-inch HD (1280 x 720 pixels) aser 2.5 sculpted Gorilla Glass lir. Nokia 3 indang processor ya MediaTek MTK 6737 quad-core lir. Iba phone indang RAM ya 2GB aser internal storage ya 16-GB lir, aser microSD ajanga 128GB tashi inoka amshitetsü.

Nokia 3 indang tesülen aser tejaklen camera ya 8-megapixel aser teselen camera nung LED flash keta lir. Nokia 3 indang battery tashi ya 2630mAh aser phone tesülen polycarbonate keta lir.

Iba phone indang operating system ya Android 7.0 Nougat aser chipset ya MediaTek MT6737 lir.

Actress Kritika Chaudhary la taktang nung sür lia ngutet



Mumbai, June 13 (Agencies): Arishi küm 30 tain actress Kritika Choudhary mejangjatetba kuli kar ajanga suburban Andheri nung lar ki dang Hombarnü sür lia ngutetogo, ta police-i metetdaksü.

Police-i la ya mejangjaba nisung kari tepeset, ta temolung melemi bilemer, ta iba ken o bushisüngdanga maparen nung ketdangseri ashi.

La asüba ya nikongtsütsü 3:45 shi nung meteta aru. Choudhary'er kidangertemi la taktang nungi tishenem adokba sülen police nem osang agütsü aser iba sülen la asüba jangjaa aküm.

Choudhary ya Andheri West, Char Bungalow tesem

nung Bhairavnath nung lia liasü. Osang angazükba sülen Amboli police tem iba tesemi ao aser la taktang kishi tsüngpoka ai. La taktang ya anogo asem pezü ka temalen nungi shibanger liasü, ta ketdangsertemi metetdaksü.

Taktang tsüngpoka aiba sülen police temi tetsür temang ka shir angu, koba mapang tatsüka lir Choudhary ta jangjaa aküm.

Mezüngbo police-i Accidental Death Report (ADR) ka benoka liasü, ta ketdangseri ashi, ajisüka bushisüngdanga aoba mapang nung Choudhary ya mejangjaba nisung kari tepeseter toktsü, ta ngutetba parnoki maneni shisem.

Moto E4 Plus aser Moto E4 phone sayaogo

June 13, 2017 (Agencies): Lenovo meyong Motorola-i Moto E4 aser Moto E4 Plus sayaogo. Moto E4 aser Moto E4 Plus ya yaküm sayaba Moto E3 aser Moto E3 Power smarthphone tem yanglushir adokba phone lir.

Moto E4 aser Moto E4 Plus smarthphone ya US nung shishilembadak sayaogo aser India nung taruba ita sayatsü imlar.

Moto E4 aser Moto E4 Plus naprongla ya camera, specifications, processor, aser battery tsütsü yaküm sayaba Moto E3 aser Moto E3 Power smarthphone tem yanglushir adokba phone lir.

Moto E4 Plus feature tem yama i alitsü:

Moto E4 Plus ya tera tuluba lir aser iba phone nung 5.5-inch HD 720x1280 display keta lir. US nung iba phone 1.4GHz Snapdragon 427 SoC keter angutsü aser North America adena or MediaTek MTK6737M chipset keter angutsü, ta osang ajanga metetdaksü.

Moto E4 Plus ya tapu ana nung angutsü; ka 2GB aser ka 16GB variant, iba den külemi 3GB RAM/ 32GB storage variant nung angutsü. Iba phone tesülen camera f/2.0 aperture, autofocus, aser single-LED flash support dena 13-megapixel-i upgrade sür angutsü.

Moto E4 Plus nung temelenshi tulutibaji fast charging densema 5,000mAh non-removable battery keter lir.

Maneni iba phone Iron Gray aser Fine Gold sentsü nung angutsü. Iba dak alaka Moto E4 Plus nung tanga specification tem Moto E4 den kasa dang lir. **Moto E4 Features tem yamai alitsü:**

Moto E4 tasenba Android 7.1 Nougat agi run asür aser iba phone nung sim ka dang amshitetsü. Phone nung 5-inch HD 720x1280 pixels display keta lir aser Qualcomm Snapdragon 425 processor mesüra Snapdragon 427 chipset keter angutsü. Iba phone nung 2GB RAM keta lir.

Moto E4 nung internal storage 16GB lir aser microSD card ka ajanga memory maneni atsülangtetsü. Osang ajanga ashiba agi North America adena or tanga tesemtem nung iba phone MediaTek MTK6737M chipsets keter angutsü.

Camera tsütsü reprangdanga, Moto E4 nung f/2.2 aperture aser single-LED flash dena tesülen camera 8-megapixel lir aser tejaklen camera f/2.2 aperture, fixed focus, single-LED flash, aser beautification mode ka densema 5-megapixel keta lir.

Maneni phone nung battery tashiji 2,800mAh lir aser battery ya agizüka amshitetsü. Connectivity option tem reprangdanga Moto E4 nung Wi-Fi 802.11n, Micro USB port, GPS, Bluetooth v4.1, aser 4G support densema lir.

Moto E4 ya US nung Liquorice Black, aser Fine Gold sentsü nung angutsü.



Mumbai, June 13: Mongolbarnü Mumbai nung Lakme Fashion Week Auditions mapang Model tem tetendangertem den tangokba noksa nung angur.

Rajnath-i Mamata'er sorkar dang Darjeeling osang tejangja meshir



Mongulbarnü Darjeeling nung Gorkha Janmukti Morcha züngsemtemi 'Gorkhaland' state tentetsü atema lungkak aidang police-i parnok senshidaktsütsü merandang agiba noksa ka angur. (Darjeeling, June 13)

Kolkata, June 13 (Agencies): Mongulbarnü Union Home Minister Rajnath Singh-i West Bengal sorkar dang nungi Darjeeling nung mepetmesü aliba osang tejangja meshiogo.

MHA-i WB Chief Secretary, Basudeb Banerjee dangi shidi ka zülu aser iba nung tenemlen aliba district tem nung yimtenren aser law & order tensa osang indang asüngdanga lir.

West Bengal sorkari school tem nung Bangla oshi agitsü sangdongba sülen tesüiba anogo ishika Darjeeling nung mepetmesü adoka lir. Iba dak sendakba nung Gorkha Janmukti Morcha (GJM)-i tenemlen aliba district tem nung ita ka mokdangtsü ayongzükba ajanga tensa mejungi aküm.

Mongulbarnü GJM-i Darjeeling nung party ajak senden ka ayongzükba amen aser iba nung state sorkari Bangla oshi agitsü tetuyuba

agütsüba aser state balaka tentetsü takhangba indang onüktem benoka lemsatöp.

Iba senden nung TMC lennirtembo maden saka tanga Gorkhaland pusemba teloktem aden aser parnoki state balaka tentetsü atema timi lungkak aitba nung shilem agitsü ta mulunga agizük.

"Tenemlen alirtem külemi longjemmer state balaka tentetsü takhangba agütsütsü atema mapang tongogo. Iba ya Gorkha nung maitsü atema rara lir aser iba ama tensa ka nung ajak longjemtsüla" ta GJM general secretary, Roshan Giri-i osangbener dang ashi.

GJM-isa ashiba agi, parnok telok ka Delhi-i aotsü aser idakji Union Home Minister Rajnath Singh den ajuruteptsü.

Mongulbarnü Chowkbazar nung mepetmesü tila ka adokba dak alaka tangalenbo mokdang tiptema dang agi.

Chowkbazar tesem nung Morcha pusemertemi sepaitem dak lung agi ona rara aser iba

jagi police-ia parnok dak süng agi züka senshidaktsütsü merang.

Chief minister Mamata Banerjee-i tenemlen tensa mita reprangtsü atema IPS ketdangser asem nem mapa lemezükja lir. Parnokji Jawed Shamim, Siddinath Gupta aser Ajay Nand nungertem lir aser tanü-a parnoki tensa reprangdanga senzü.

GJM-i mokdangba ajanga tourist tem timtem ajuru aser parnok meyipa yoktsü atema June 9, 2017 nü Chief Minister Mamata-i Darjeeling nung mungzükba liasü.

State sorkari sorkar school tem nung Bangla oshi 'compulsory' agitsü tuyuba anema ola adokba atema Mamatu-isa Bimal Gurung dang 'Lakshman Rekha' adena maitsü tuyu.

Tan ita tatemlen Darjeeling MP SS Ahluwalia-i anir Centre nung BJP lennir telok kati Darjeeling semdangtsü sentong lir.

Shatrughan Sinha-i L K Advani Tir shimtsü ayongzük

Patna, June 13 (Agencies): BJP tir Amit Shah-i presidential election nung nübo shimtsü atema minister asem luden ka shimba sülen anogo ka lir, Patna Sahib MP, Shatrughan Sinha-i L K Advani tir shimtsü atema tenüng benokogo.

"Presidential election atema anogo tonga arudang, ni Advani pusemer aser saklokertem

tebilemba lemsateper. Akhümket menden nung amentsü atema pa tetemsü lir" ta Shatrughan Sinha-i Twitter nung metetdaksü.

"BJP nung tambusang nem iba tetushi agüjang ta ni nisung ajak ayongzük. Pa iba menden asoshi tetemjen nübo ka lir aser nisung ajaki ibaji angatetsü imlar" ta paisa

shisem.

"Advani ji PM inyaktsü nübo tetemjen ka lir. Pa nem linük len anitsü atema khen danga maongka magütsüdang.

BJP mesüra BJP adener alir shingaia pai ajangshia arubatem den metokteptetsü" ta nisung kati pa dang ashi ta Shatrughan-isa Twitter nung lemsateper.

Aluyimer longkak aitba sentong nung Congress lenir Jyotiraditya Scindia apu

Ratlam/Neemuch, June 13 (Agencies): Madhya Pradesh, Mandsaur tesem nung aluyimertemi longkak aitba ajanga 'prohibitory order' agütsür aliba mapang Congress telok nung lenir, Jyotiraditya Scindia den party lenir kar Mongulbarnü apu.

Scindia den Congress MP, Kantilal Bhuria aser party lenirtem ka Mandsaur district nung aliba Dhodar checkpoint nung apu, ta Superintendent of Police, Manoj Singh-i ashi.

Congress lenirtem ya mapu tsüngda toll booth ka nung mener Mandsaur-i parnok yoktsüla, ta longkak ait.

"Mandsaur nung Section 144 temzüng agüja lir aser iba ajanga iba tesem nung yimjung mali, ta sayur. Kü kija iba tesem-i onür saka police temi memelar," ta police temi mapu tsüngda Scindia-i osangbener dang ashi.

Madhya Pradesh nung aluyimertemi loan agia aliba tanaben sorkari meyipa memeshitsüla aser aluyimba nungi adokba chiyongtsütem nung sorkari jenjang meyanglutsütsü asoshi June 1 nungi tenzüka aluyimertemi longkak aitba mapang June 6 nung police temi longkak aiter nisung pongu Mandsaur nung khaset.

Iba sülen lenmang mokdanga



aser oset-tsüset rongdoka aser long agi aonba lendong balala ya Madhya Pradesh anülulen aliba Neemuch, Dhar, Ratlam aser Jhabua tesemtem-i asemshia ao.

Iba ama densa ka nung Congress MLA, Shakuntala Khatik-i nüburtem dang police station nung mi asentsü ajungshiba ajanga pa apu.

Khatik-i nüburtem dang police station nung mi senloksütsü ajungshiba indang video ka prokshia lir. Khatik ya Shivpuri district kübok Karera Assembly nungi lir aser Mandsaur nung aluyimer tepsetba anema June 8-nü Karera Police Station nung longkak aitba mapang iba video ya tangok.

Police temi injang khashiba mapang aluyimertem asür kibong semdangi Congress tatong tir, Rahul Gandhi June 8 nung Mandsaur-i aoba mapang police temi apu.

Puducherry sorkari cement jenjang dalang agi agütsütsü

Puducherry, June 13 (Agencies): Puducherry sorkari tanü ashiba agi, parnoki nüburtem sen kanga ajema aartem aser tomta nung aartem atema jenjang temela nung cement agütsütsü asoshi benokdangogo aser iba scheme ya Congress tir Sonia Gandhi tenüng nung jatsütsü ta lemtetogo.

"Onoki kidanger Tamil Nadu nungi ajizüka iba scheme inyaktsü sentong lir. Cement tem ya jenjang ajemer agütsütsü aser maparentem ajak ketdangsertem den asüngdangteper ang inyaktsü," ta Welfare Minister M Kandasamy-i assembly nung metetdaksü.

AIADMK (Ammam) legislator A Anbalagan-i cement indang jenjang koma angur ta asüngdangba nung pai telangzüba agüja liasü.

Tamil Nadu nung "Ammam Cement" scheme anemoker küm ishika inyaka arudar. Sen kanga ajema aartem aser tomta nung aartem ki square feet 1,500 tashi

asürtem atema cement seret 50 bag sen 190 agi agütsür.

Kandasamy-i ashiba agi, Puducherry nung iba cement scheme benokdanga aliba ya Congress tir Sonia Gandhi tenüng nung jatsütsü.

Iba ken o jembishinü nung shilem agia Chief Minister V Narayanasamy-i ashiba agi, Puducherry nung cement yangludak industry mali, anungji cementji tanga len nungi bener arua jenjang dalang agi ayoktsü.

Ki yangludang nüburtem aser private kisüba company tem lisem alitsüba nung tetsükdaksü adokba nung, pai ashiba agi, Tamil Nadu sorkarden pai iba tebilemstü lemsatepogo, kechiyong Puducherry atema lisem timbaka Tamil Nadu nungi belener.

"Iba tebilemstü tekaratiba nung bentetsü merangtsü," ta pai ashi.

Anbalagan-i ashiba agi, taoba ita asem tsüngda lisem agi kanga anüngogo aser iba ajanga kisüba maparen aika anena lir.

GOVERNMENT OF NAGALAND

DIRECTORATE OF EMPLOYMENT, SKILL DEVELOPMENT & ENTREPRENEURSHIP NAGALAND : KOHIMA.

NO.DET-2/14/2001(Pt-I)

Dated Kohima, the 13th June 2017

ADVERTISEMENT

The Directorate of Employment, Skill Development & Entrepreneurship in Technical Association with NEITCO, Guwahati is conducting an Entrepreneurship Development Programme for Science & Technology, persons at Kohima under sponsorship of the Department of Science & Technology, Govt. of India, New Delhi through EDII, Ahmadabad with effect from 04-07-17. Male & Female candidates within the age group of 18-40 years with qualification of Engineering / ITI or Diploma of at least 2/3 years in any branch & Science background from recognized Institute may apply. For details and Application Form please contact:- Office of the Directorate of Employment, Skill Development & Entrepreneurship, Nagaland, Kohima on or before 01-07-2017. Mobile No:- 9436062368.

(MUTHINGNYUBASABGTAM)

Director

Employment, Skill Development & Entrepreneurship
Nagaland, Kohima.

Issued by: DIPR

Office of the

LIRMEN VILLAGE COUNCIL

Mokokchung, Nagaland

Tepela Sangdonger

Naga Students Federation (NSF) 2017-2019 tenure nung 'Information & Publicity' Secretary inyaktsü asoshi ozü senso tajung, Sp. S. Shilukaba Longchar shimba atema, yimden ajanga tepela osang lemsateper.

Maneni, NSF Tir, Kesosul Christopher Ltu-i anir ketdangpurtem ajak dang ochi nung aser nübur meima tenzütsü, yimden ajanga ajungshir aser imlar.

T. Kirem Longkumer
Chairman
Lirmen Village Council

Lanupokym
Secretary
Lirmen Village Council

Bangladesh anentsü lendong nung nisung 90 dak tali asü

Dhaka, June 13 (Agencies): South-east Bangladesh nung tsüinglu kanga sashia aruba ajanga anentsü aluba lendong nung nisung 92 süoko aser parnok rongnung mitkar pongu lir, ta ketdangsertemi ashi.

Rangmati district administration indang odongtar kait ashiba agi, iba district kisüng nunga anentsü ajanga südaksü nisung 60 lir.

Tsüingsang kanga majungba

ajanga teyari agütsütsü tasak lir. Telecommunication tesetdaktep aser electricity ajunga raksatsüogo aser tesem ka nung aliba nisungtem den bo osang agiteptsüa makoker, ta osang ajanga ashir.

"Iba lendong ajurua aliba tesem aika den osang magitepteti lir. Tsüinglu anenba sülen-ang iba anentsü ajanga teraksa aser tesama agütsüba ajunga metettsü aser iba mapang ang teyari

agütsütsü mapa balala inyaktettsü," ta Department of Disaster Management nung tekolakba, Reaz Ahmed-ia ashi.

Rangamati district nung India den arrtsü anasa tenemtsüng nung aliba yimtsüng ka nung nisung aliba ki aika anentsü agi anenbangogo.

"Iba anentsü aluba mapang nisung kar bo parnok kidang mejanga orr liasü," ta Rangamati district indang police tekolakba,


Sayed Tariqul Hasan-ia osangbener dang ashi.

Mitkar asürtem ya Rangamati nung anentsü agi raksatsür aliba lenmang yanglushiba mapang anu anentsü tasen alua anenbang, ta mitkar indang odongtar ajanga osangbener dang ashi.

Tsüinglu tesashi aruba ajanga Bangladesh yimtiba, Dhaka aser linük nung tongtibang yimti, Chittagong nung gari senzüsempongba nung timtem

agütsü. Taoba ita South-east Bangladesh nung Cyclone Mora arua ki meyrjang aika raksatsü aser iba lendong ajanga nisung ti taküm sama-a liasü. Iba ajanga nisung million ka-shi pei talidak ki dontsür aotsüsa aküm.

Southern Bangladesh nung tsüinglu kanga aruba ajanga mapang shia anentsü aludaktsür. 2007 küm Chittagong nung anentsü aluba ajanga nisung 130 taküm samaja liasü.



M.O.D.I. FEST

MAKING OF DEVELOPED INDIA

Join

Prime Minister Modi

in Making of Developed India

Script the story for better tomorrow

Write a scenario along with co-participants & script your story of better India.

Information that empowers you

Information, Communication & Education about Constitutional Scheme & Initiatives

Exhibition

Experience the making of developed India

Jain Ki Baat

Share your "Jain Ki Baat" with PM through postcard, recorded TV or through All India Radio

Rating

Rate the Development work of your Government

Entertainment & Engagement

Settle with the PM, Q&A, Entertainment, Lucky Draw & Inspiring Stories

Narrow App

Download Narrow App for wealth of information & other content without internet connection

South Hall, Vishwasis Hall, Ho Raha Vikas Hai

| CITY | Manager |
|----------|-----------|
| Location | Team Hall |




Date: 14th to 16th June **Time: 11 am onwards**

TATA

TATA PROJECTS

CONSULTANCY SERVICES

ASSOCIATE SPONSORS



Ao Students' Union Tzudikong Executive Member tem 10-06-2017 anogo nung NPPC Colony nung main road nung gari lenmang majungba aser arem meruka inyakdang agiba noksa nung angur. Company aser Ao Student Union Tzudikong teti ama-a litepba inyakyim ajak nung aoer ta Tiamongba ASUT President-i sangdong ka ajanga metetdaksu.

SANGDONGER

Mrs. Imnanungla Jamir aser Miss Tsuknungmakla Jamir Changtongya, tena nem shibaisa sen aputsua ali aser aputsutir, parnok khuret asutsu. Ibaji kinungeri memetet.

**Kinunger tenung nung,
Mr. Sutsungnenba
Changtongya**

Pelaba Lemsateper



30:12:1932 - 29:05:2017

Ozu temeim kinungbo, obala, oboula, tembar aser tesayur asur **M.Yanglu Jamir** shiranga alidang aser pa May 29, 2017 nu iba lima nung pilar onok mangyim jashi nung alidang, sarasadem, nu bo aser rongsen agi onok dang meima yariogo, nenok ajak dang tebang agi meshitetba tepela lemsateper. Nenoki temeim aria bilem, sarasadem aser teyari tulu agi onok mulungjang kanga kongshiogo.

Onoki nenok nisung shia dang pelaba meshitetaka, Kibubai nenok ajak talubosa moajang ta onoki sarasademtsur.

- **Temeim kinungsü, Chirnur, anuk-apang,
semchir aser kinungertem.**

GOVERNMENT OF NAGALAND DIRECTORATE OF TECHNICAL EDUCATION NAGALAND : KOHIMA

No. DTE/ESTT-2/15/2017-18

Dated: 8th June, 2017

NOTIFICATION

This is to inform all the interested candidates desiring to pursue undergraduate course in Engineering, Nursing, Paramedical and Agriculture & Allied course in private institution/universities that there will be counseling for admission - on 21st and 22nd, June 2017 in the office of the Directorate of Technical education Nagaland Kohima from 11 A.M onwards.

Representative from various private technical institution and universities will be participating in the counselling session. Intending candidates are invited to attend the counselling and avail the opportunity of interacting with these Institutions/universities and take spot admission of their choice of studies.

(Er. Arjun Singh)
Director

Issued by : DIPR

GOVERNMENT OF NAGALAND DIRECTORATE OF TECHNICAL EDUCATION NAGALAND : KOHIMA

Dt. Kohima, the th June, 2017.

NOTIFICATION

NO. DTE/ ESTT-2/ 3/ 2016-17 : This for general information that Regional Institute of Printing Technology, West Bengal have reserved 1 (one) seat of 3 year Diploma course in MULTIMEDIA TECHNOLOGY for the State of Nagaland during 2017-18 session.

- ELIGIBILITY :-**
- Must be an Indian Citizen
 - Must have passed 10th standard with at least 35% marks.
 - Should not be born after 01-07-2002.

Interested candidates may apply for the same through application in plain paper. Last date for submission of application to the office of the undersigned along with all the necessary documents is on or before 27th June, 2017. Selection of candidate will be done on the basis of academic mark.

(ER. ARJUN SINGH)
Director

Issued by : DIPR

GOVERNMENT OF NAGALAND DIRECTORATE OF SCHOOL EDUCATION NAGALAND: KOHIMA

NO.ED/SCHO/PMS-4/2014-15

Dated Kohima, the 13th June 2017

PRE-MATRIC SCHOLARSHIP SCHEME UNDER MINISTRY OF MINORITY AFFAIRS.

This is to inform that the Ministry has opened the National Scholarship Portal (NSP) on 1st June, 2017 for applying online scholarships for 2017-18. The online implementation of Pre-Matric Scholarship Scheme will be done through the National Scholarship Portal (NSP) of the Government of India, under URL www.scholarships.gov.in. The detailed guidelines and standard operation procedure of the scholarship scheme is available in the Portal.

In view of the above, all the students and Head of Institutions are requested to take the following action:

- Institutions that are yet to get registered in the Portal are requested to register at the earliest from their respective DEO Office so that the students can apply on time.
- It will be necessary for the eligible applicants to provide Aadhaar number while applying for the scholarship and in case, a student does not possess Aadhaar, He/She should upload the first page of Bank/Postal Account Passbook with photo, in the name of the applicant (either single or joint account with his/her parents/guardian). In case of joint bank account, candidate's name should be first in the Bank Account.
- The tentative timeline activities for the year 2017-18 for fresh and renewal of scholarships in respect of Pre-matric is:-

| S.No | Activities | Date |
|------|--|---|
| 1 | Submission of Online applications for Fresh Scholarship by the students. | 1 st June to 31 st August, 2017 |
| 2 | Submission of Online applications for Renewal Scholarship by the students. | 1 st June to 31 st July, 2017 |

- Students are advised to make use of Frequently Asked Questions (FAQs) available on the NSP homepage of the website for filling up of Online Application.
- Name in the scholarship form, Aadhaar, and Account number should be same.
- Bank Account should be operative.
- Students those who had received scholarship for 2016-17 should APPLY FOR RENEWAL and students who did not get scholarship last year/applying for the first time will have to APPLY FOR FRESH.
- Students are asked to opt for Pre-Matric Scholarship Scheme for Minorities and not Umbrella Scheme of Scholarship to ST students studying in class IX & X.
- USER ID and PASSWORD of Institutions and students will remain the same as last year.
- All efforts should be made to adhere to the timelines given on the Portal.

(SMITA SARANGI, IAS)
Principal Director

Issued by: DIPR

TENÜNGSANG AGÜTSÜR

UNGMA JENANGSANGER JAMIR KIDONG-i item senso tajung ana nem pei wadang nung jenjang tulu tongtetba atema konang tetushi agütsür.

- Mr & Mrs. L.Sosang Jamir'er jabaso Wb. Imlimeren Jamir-i Additional Commissioner (IRS) jenjang tongtetba
- Late. Akangwati Jamir jabaso Wb. Ngangshimokok Jamir-i Assistant Controller (Class -I Gazetted) Department of Legal Metrology and Consumer Protection, Govt of Nagaland jenjang tongtetba

Tsüngremi nenok taküm nung maneni takok temoatsü nung len aniangma.

T. Onen Jmr
Raren Jmr
Tako Jmr
Senti Jmr
Nungsang Jmr
Kika Jmr

TATAR
TATAR
TATAR
TATAR
TATAR
G.B

Office of the LONGKONG STUDENTS' UNION FELICITATION

We the Longkong Students Union with immense pride and honour extend our heartfelt congratulation to:

- Miss Imlisenla Imsong, D/o Mr. Marsoba Imsong & Mrs. Lanusangla, on being conferred Bachelor of Church Music and securing the Best Performing award (Voice) from Singapore Bible College, Singapore
- Miss Sentirenla D/o Mr. Masatoba and Mrs. Yangermongla, for achieving Gold Medal in statistics (Msc) from Cotton College State University Guahati, Assam.
- Mr. I.Jungshinungsang Imsong S/o Mr. I. Sowa Imsong and Mrs. P. Moaienla Lemtur on completing Bachelor of Engineering (Civil) from Assam Down Town University, Assam.
- Mr. S. N. Sungkum Jamir S/o Late. Sentiyangba Jamir and Late. Tongdanglemla on being promoted to head Master.

The Union further congratulates to all successful candidates of HSLC, HSSLC and degree Examination 2017 and wishes them success in their further endeavour.

Sd/-
Temsusenla
General Secretary

Sd/-
Arenlong
President

SANGDONGER

Ni Wb. Yimyangpa, arishi küm 65 S/o Lt. Imnapokym, Molungkimong nung, tang Sungkome Ward Mokokchung, Nagaland nung alir, ni yangi tsünglanglen agüja alibatem ya tenangzüba tulu nung sangdonger :

- Ni India senso ka
- Kü kinungsü Smti. Odongjunglai 2006 küm kü den tanurtem ajak yutsür ao aser la kija Dimapur nung taoba küm 11 onok den kecha tongtepratep mali alir, anungji balaogo.
- La kibong toksür orr külen la nisung aika dang sentsütsür aküm aser lai senotsü apuba aser sentsü atsüba maparen kecha nunga ni guarantor mesüra surety ama sign süa mali.
- Küm 11 balala lir külen, ni Dimapur nung ozü tanur kibong kümer balaka nung alirtem den ajuruteptsü alu, saka yangji ni pur amokmerena documents kar nung sign südaksü, ajisüaka ni 2006 küm nungi kinungsü den balala alir asünungji, balar aliba kinungsüi atsüba sentsü atema ni kecha khuret mabentsü.
- Iba tenangzüba tulu sangdongba nükjidong ya küna balaogo aser taoba küm 11 balala alir aser kü taküm kümzütsü asoshi ni amokmerena tsüngdang kechi documents nunga sign süogo, ibaji atema ni kecha tai mabentsü ta competent authority tsüngdang nangzüler.

Anungji, yangi paragraph 1 nungi 5 tashi nung nie kechisa shiogo, itemji nie kanga junga meteta shitak shiogo aser yangji kecha miim o mali ta nangzüker.

(Signature)

DECLARANT
Solemnly sworn and declared before
me on this 13th of June 2017.

CHIEF JUDICIAL MAGISTRATE / NOTARY PUBLIC
DIMAPUR, NAGALAND
13/06/17
NOTARY PUBLIC
GOVT OF NAGALAND, INDIA

Indonesia Open nung Saina-i Ratchanok kokogo

Jakarta, June 13 (Agencies): Indonesia Super Series asayamong asemben tashi koker alila Saina Nehwal-i Thailand tsür Ratchanok Intanon Mongolbarnü mezüngbuba asaya nung koka tanabuba round-i iogo.

Saina shiba küm 7 tsüngda nung tang mezüngbuba World top-10 nungi tugua ali, lai 17-21 21-18 21-12 agi taoba world champion Ratchanok madak takok nguogo.

Saina aser Ratchanok na tsüngda 12 ben asayaba nung

lai 7ben koka lir. La tanabuba round nung maneni Thailand tsür Nitchaon Jindapol den asayatsü aser quarter-final nung World No. 1 Tai Tzu Ying den asayatsü akok.

Kasa asayamong tarep temeyoktep asaya nung B Sumeeth Reddy aser Ashwini Ponnappa na 12-21 9-21 agi Indonesian nunger Irfan Fadhillah aser Weni Anggraini na mekoki asayamong nungi tuguogo.

Asaya mezüngbuba set nung Saina-i kanga junga asayaa

tenzüik aser mapang ka nungbo lai 10-4 agi Ratchanok jakdang liasü saka break sülen Ratchanok-i kanga junga asayaa mezüngbuba set lai akok.

Tanabuba set nung Saina 12-7 agi tejakdang liasü saka mapang tatsüka tsüngda nung score 16-16 ta kasa aküm, iba sülen Saina-i kanga junga asayaa iba asaya akok.


Deciding asayaba nung tetenzük nungi Saina tejakdang sür tenzüik aser lai 21-12 agi iba asaya ayong ayonga akok.

Mezüngbuba Kohima district Inter-School tournament akatsü

Kohima, June 13 (TYO): Mezüngbuba Kohima District Inter School Football Tournament 2017, Department of school Education aser Royal Club Kohima-i ayongzüka June 23 nungi July 13 tashi Kohima local ground nung asayatsü. Form submit asütsüba anogo June 16 tashi atsülangba asayamong ayongertemi metetdaksü.

Maneni asayamong ayongertemi form Red Cross building complex anasa Ura Hotel, United Traders Main Town aser Havells Galaxy High School Junction nungi agizüka idakji submit sütettsü ta metetdaksü. Osang balala agitsü asoshi item phone number; 9436000547 mesera 9612162669 nung tongteptsü asoshi metetdaksü.

Cristiano Ronaldo anema Spain nung ken o benoka lir



Madrid, June 13 (Agencies): Teburtem football asayar nungtugu, Cristiano Ronaldo-i Spanish tax ketdangser ashioksüba anema Mongulbarnü ken o benok. Pai 2011 aser 2014 küm tsüngda sen million \$16.48 indang tax magütsünüdang Spain nung tax ketdangsertem kelakoktsü, ta osang ajanga ashir.

Spain nung prosecutor indang office ajanga ashiba agi, Real Madrid telok nungi asayasangi metetsümonga Spain nung pa indang noksa temeden nungi azükba sen meyimzüka ayutsü mechi 2010 küm shishilembaba sentong ka tenzüik.

Iba ken o nung Real Madrid-i kicha telangzüba magütsü aser Ronaldo indang agency, Gestifute dangi call asüba magizük.

Spain nung football asayartem tax magütsütsü asoshi meyimzüka ayuba amala ken o nung Ronaldo ya tang tesüsa aiter. Iba amala ken o nung Barcelona telok nungi Lionel Messi aser Neymar nunger-a densema lir.

2005 aser 2010 küm tsüngda Spain nung bendanger

asayartem ya "Beckham law" ta sür temzüng ka ajanga tax magütsü aru. Saka iba linük nung rongsenketsüng jenjang tamajungba akümba ajanga iba temzüng ya agien aser tax magütsüba dak sendakba ken o benoka jembitsü tenzüik.

Ronaldo-i 2011 küm sen million 1.4 euro, 2012 küm sen million 1.7 euro, 2013 küm sen million 3.2 euro aser 2014 küm sen million 8.5 euro indang nung tax ketdangsertem kelakoktsü, ta Spain Prosecutor indang office ajanga aitsür.

Ronaldo ya Portugal nungi lir aser 2010 küm January ita nungi Spain nung tax agüja alitsü molungtet aser Spain nung bendanger mapa inyakertem tax agüja aliba ama agütsütsü asoshi 2011 küm November ita molungtet, ta osang ajanga ashi.

Spain temzüng nung aliba ama Ronaldo-i 2011 küm tax shilem 24 aser tanüngba küm asem nung tax ya shilem 24.75 agütsütsü liasü, ta kasa osang ajanga ashi.

2008 küm December ita nung Ronaldo-i Real Madrid telok nungi asayatsü asoshi contract zülutepba mapang British Virgin Islands nung aliba Tollin Associates Ltd nem pa indang noksa temeden agütsü aser iba mapang iba company nung 'stakeholder' ya Ronaldo kisüng liasü," ta prosecutor ajanga ashi.

Iba sülen Tollin Association ajanga Ronaldo indang noksa temeden ya Ireland nung aliba company, Multisports&Image Management Ltd nem agütsü aser iba company ajanga pa indang noksa temeden

ketdangsea amshi, ta Spain sorkar-i shimteta aliba obendanger temi ashi.

"Tollin Associates nem noksa temeden agütsüba ya nüngdak maliba mapa ka liasü aser iba nükjidong ya pa indang noksa temeden nungi anguba sen ya Spain nung tax ketdangsertem dang meyimshitsü sentong liasü," ta ashir.

Prosecutor indang office ajanga Ronaldo anema iba ken o ya Madrid district nung aliba Pozuelo de Alarcon court nung Mongulbarnü benok.

Champions League final Juventus telok den asayaba mapang Ronaldo-i goal ana agüja Real Madrid-i 4-2 agi akok aser iba tournament nung pai goal 12 agütsüteta iba tournament nung pa goal agütsür temaba jenjangi atu.

Noksa temeden nung Messi-i sen million 4.1 euro indang tax magütsü Spain nung tax ketdangser kelakoktsüba ajanga Catalan regional court-i pa ita 21 tepuokdak ayutsü obendang agütsü. Lionel Messi-i iba obendang agütsüba repringshitsü asoshi Spain indang Supreme Court nung temepeshiba ken o benok, saka Supreme Court-i magizük.

Saka Spain temzüng nung tepuokdak küm ana dang tajemba ayutsü obendang agütsüba ya 'probation' nung süidaksür.

Centre-i achiajemba... (Tapak 1 nungi...)

Rajnath Singh-i Aizawl semdangba mapang nisung noklang aikati nashishi benjung ka ayongzüka amung.

Raj Bhavan nungi metre 200 shi pilar aliba Vanapa Hall nung nashishi benjunggi ayongzüka amung. Iba sentong ya Zolife ta ser Mizo nunger telok kati ayongzük.

Nashishi achitsü ajungmesotsü atema masü saka India Linük Temzüng nung senso nem temeten agüja aliba nung ammettsü atema iba sentong ayongzük, ta Zolife-i metetdaksü.

Iran World Cup atema qualify süogo

June 13, 2017 (Agencies): 2018 World Cup qualifier nung Iran-i 2-0 agi Tehran nung Uzbekistan koka taruba World Cup atema qualify asüba team tanabuba kümogo.

Iba asaya nung Iran pur atema Sardar Azmoun aser Mehdi Taremi nati goal kaka agüja liasü. Coach Carlos Queiroz kübok Iran team tang mezüngbuba World Cup ana nung atonga shilem agitsü asoshi

maongka nguogo.

World Cup 5ben tashi koker aliba Brazil telok Russia nung asayatsü aliba World Cup atema mezüngbuba qualify süa liasü.

Asia nung qualifying group ana küma lemsar lir aser iba group nung temaba jenjang nung tembangba telok ana qualify asütsü aser tasembuba jenjang nung tembangertem play-offs asayar khelenang telemtetba agitsü.

NBA Finals 2017: Warriors-i Cavaliers kokogo

Oakland, June 13 (Agencies): Hombarnü Golden State Warriors-i 129-120 agi Cleveland Cavaliers madak takok ngua NBA championship season asembuba nung tanaben kokogo.

Warriors puri 2015 küm final nung Cleveland pur koka liasü saka yaküm parnoki Cleveland pur makok.

Warriors pur rongnungi Kevin Durant-i point 39 nguteta parnok ajak rongnung

pai point timba ngutet saka iba takok ya par telok ajak longjemmer asayaba ajanga koktet. Arishi küm 33 tain Andre Iguodala aser arishi küm 21 tain Patrick McCaw nayia iba asaya nung shilem tajung agia liasü.

Cleveland pur rongnungi LeBron James-i point timtiba ngutet. Pai point 41 nguteta liasü. Ajisüaka Cleveland pur defense tashi maitba ajanga parnoki iba asaya makok.

Bharatiya Janata Party ya... (Tapak 1 nungi...)

BJP ya tamangba yimsü anemer party ta olulu jembiba ka jangjashitsüdang, Nagaland nung pastor aser missionary-tem tepsetba aser sentep ki raksatsüba kecha mali, anungji, olulu agi nüburtem memangmangtsüla, ta paisa ashi. Tanga state nung nashi shi nokdangba indang mejembitsüla, kechiyong Nagaland nungbo shingai nokdangtsü makok aser pei amangnüba tamang yimsü sademsadema amangtetsü, ta paisa shisem.

Alima ajunga nung kin tulu alidakji kin tila purji timtem terabosa ajurur (communal clash), aser India lima nunga yamaji state kar nungbo ataloktsü akok, saka BJP-ibo tamangba yimsü shinga anema meinyaker aser party nükjidongjia ibaji khenyongi memelar aser linük temzüng nunga pei amangnüba yimsü amangtsü asoshi melaa lir, ta iba osangbeneri BJP lenirtem dang asüngdangba ka langzüdang parnoki ashi.

Centre nung BJP-i yimsü asüdang, Nagaland atema mapa kechisa inyak? ta metetnüa asüngdangdang, teinyaktetbaji ya-a tabo mali, kechiyong tangji NPF-i aniba sorkar nung onok dena liaka tenüng agidang lir, saka kodang state nung BJP sorkar arudir, idangji terenlok jenti arutsü, ta BJP lenirtemisa ashi.

"NBCC aser ABAM-i koba clean election atema inyakdar, iba mapaji Nagaland BJP-ia nungiter aser onoka yangji noktaka lir", ta tasüngdangba ka langzüdang BJP lenir kati ashi.

Tang Mokokchung nung BJP züngsemji meyi tenet dak tali lir aser item rongnung tebur teimba lir, ta district BJP ketdangsurtemi ashi. Taruba election nunggi Mokokchung district nungi candidate tajemba agi seat tenet (7) nungbosa tokteptsü renemdaki saka "kwi adoktsü imlar ta asüabajibo tang-tangbo ashitsü tera karara", ta parnokisa shisem.

RHMS-i Dr. Surhozeli... (Tapak 1 nungi...)

Embassy of India, Hanoi nung June 16-17, 2017 tashi benjunggi amungtsü. Iba kenten sentong ya Rattle and Hum Music Society-i Eclectic Northeast den yaritepa ayongzüker aser Ministry of DONER kübok North Eastern Council (NEC)-ia teyari agütsür.

6 buba International Edition Handshake Concert 2017 nung shilem agitsü atema North East

nungi nisung 18 den RHMS ketdangpur 5 June 14 nü apusotsü, ta tanü osangbener senden ka nung ashi.

Iba sentong atema Nagaland nungi Polar Lights aser Vekhriyi & Vetahulu nungertemi shilem agitsü. Parnok den Meghalaya nungi Rida and the Musical Folks aser Assam nungi Charaideo Sanskritik Gosthi nungertemi shilem agitsü.

BILEM DANGANG
"Asenok atema züngdangtsü tasaktiba ji temoatsü ya lir".